

Permukiman Menteri Luar ASEAN landasan kukuh sidang kemuncak

- Dengan pragmatisme dan saling menerima sebagai asas, Mohamad menekankan pentingnya ASEAN memperluaskan kerjasama dengan pihak luar bagi membentuk rantau lebih stabil dan bersatu

- Kesimpulannya, Mohamad lulus ujian pertama kepengerusiannya dengan cemerlang, sekali gus membuktikan kemampuan beliau mengemudi ASEAN ke arah yang lebih kukuh dan bersatu



Oleh Prof Madya Dr Nazariah Osman
bhrencana@bh.com.my

Permukiman Menteri Luar ASEAN (AMM) di Langkawi menandakan titik penting dalam kepengerusiannya Malaysia bagi ASEAN pada 2025.

Menteri Luar, Datuk Seri Mohamad Hasan berjaya mempamerkan kemampuan dan kepemimpinannya dalam mengemudi perbincangan peringkat tertinggi ini.

Permukiman ini membincangkan empat topik utama kritikal, iaitu keutamaan Pengerusi ASEAN Malaysia pada 2025; tindakan susulan kepada Sidang Kemuncak ASEAN Ke-44 dan Ke-45 mengenai Kajian dan Keputusan Pemimpin ASEAN terhadap Pelaksanaan Konsensus Lima Perkara; hubungan luar dan pertukaran pandangan mengenai isu serantau dan antarabangsa.

Di bawah kepemimpinannya, Mohamad menggariskan tiga keutamaan utama jelas dan strategik.

Keutamaan pertama ialah Malaysia akan memperkukuh penumpuan ASEAN dengan mempromosikan kepercayaan strategik antara negara melalui dialog berterusan, diplomasi dan hubungan baik.

Dengan pragmatisme dan saling menerima sebagai asas, Mohamad menekankan pentingnya ASEAN memperluaskan kerjasama dengan pihak luar bagi membentuk rantau lebih stabil dan bersatu.

Keutamaan kedua ialah Malaysia akan mendorong komitmen lebih kukuh untuk meningkatkan perdagangan dan pelaburan dalam ASEAN.

Ini juga termasuk berusaha meneroka dan memperluaskan kerjasama ekonomi ASEAN dengan blok ekonomi utama di luar rantau ini seperti melalui Sidang Kemuncak ASEAN-Majlis Kerjasama Teluk (GCC)-China yang akan berlangsung di Kuala Lumpur, Mei depan.

Keutamaan ini turut memberi penekanan kepada inovasi teknologi dan transformasi digital.

Keutamaan ketiga ialah Malaysia akan memastikan elemen inklusiviti dan kemampunan yang

menjadi tema Pengerusi ASEAN-Malaysia 2025 menjadi teras dalam usaha pembinaan komuniti serantau.

Ini termasuk usaha merapatkan jurang pembangunan dan ketidaksamaan, meningkatkan taraf hidup serta menangani kesan perubahan iklim bagi memacu pembangunan, pertumbuhan dan kemakmuran demi manfaat semua lapisan masyarakat.

Pembinaan Komuniti ASEAN

Mohamad turut memacu perhatian kepada dua hasil utama di bawah agenda pembinaan Komuniti ASEAN.

Pertama, Ulang Tahun Ke-10 Penubuhan Komuniti ASEAN dengan beliau mencadangkan pegawai kanan ditugaskan untuk merangka Deklarasi Kuala Lumpur sempena ulang tahun ini bagi diterima pakai oleh pemimpin ASEAN semasa Sidang Kemuncak ASEAN Ke-46 di Kuala Lumpur. Ini sekali gus akan menjadi batu tanda pencapaian penting ASEAN sejak 2015.

Kedua, Visi Komuniti ASEAN (ACV) 2045 dan semua pelan strategiknya yang akan diterima pakai pada Sidang Kemuncak ASEAN Ke-46 di Kuala Lumpur.

Malaysia memimpin usaha memuktamadkan pelan strategik ini melalui kerjasama erat dengan Pasukan Petugas Peringkat Tinggi Visi Komuniti ASEAN (HLTF-ACV).

Menteri Luar memaklumkan beliau amat berbesar hati kerana ia hampir menyelesaikan tugas mereka untuk merangka ACV 2045 dan semua pelan strategiknya.

Dalam agenda tindakan susulan kepada Sidang Kemuncak ASEAN Ke-44 dan Ke-45 pula, Mohamad memaklumkan Malaysia tetap teguh dalam sokongan mengenai Timor-Leste.

“ASEAN mesti terus menunjukkan kesentralan dan menuntut kebertanggungjawaban bagi keamanan sejagat”

Justeru, Malaysia bekerjasama rapat dengan semua anggota ASEAN untuk memastikan Timor-Leste mendapat tempat sewajarnya di ASEAN, termasuk memberi sumbangan bagi menyokong penubuhan Unit Timor-Leste dan program pembangunan kapasiti bagi 319 pegawai Timor-Leste.

Mohamad juga berkongsi pendirian Malaysia mengenai Kajian dan Keputusan Pemimpin ASEAN terhadap Pelaksanaan Konsensus Lima Perkara.

Walaupun usaha besar dilakukan Pengerusi ASEAN sebelum ini, situasi di Myanmar masih berada dalam keadaan kritikal.

Konflik berterusan di Myanmar memberi kesan serius kepada rantau ini, terutama negara jiran dengan Langkawi sendiri menyaksikan impak daripada perpindahan penduduk di Myanmar.

Di tengah-tengah krisis berterusan di Myanmar ini, Mohamad menunjukkan keberanian dalam menyuarakan keperluan untuk penyelesaian segera.

Beliau menjelaskan situasi di Myanmar akan kekal menjadi keutamaan utama dalam agenda ASEAN semasa Pengerusi Malaysia.

Malaysia komited menggunakan semua saluran tersedia untuk menyelesaikan krisis di Myanmar, termasuk melalui Mekanisme Troika.

Mengenai hubungan luar, sebagai penyelar hubungan dialog ASEAN-China, Mohamad mengumumkan Malaysia sedang meneliti Zero Draft bagi Pelan Tindakan (PoA) baharu untuk Perkongsian Strategik Komprehensif (CSP) ASEAN-China bagi tempoh 2026-2030.

Malaysia percaya dokumen ini perlu memberi tumpuan kepada hala tuju yang boleh dilaksanakan dan strategik, khususnya dalam bidang ketahanan ekonomi dan kemampunan, keselamatan dan integrasi serta keamanan dan keselamatan.

Mengenai isu serantau dan antarabangsa, Mohamad berpesan, ASEAN mesti memastikan ketegangan geopolitik tidak meningkat sehingga mengancam keamanan, keselamatan dan perdagangan global di Laut China Selatan.

Beliau menekankan keperluan untuk dialog dan diplomasi selaras dengan undang-undang antarabangsa, termasuk Konvensyen Pertubuhan Bangsa-Bangsa Bersatu mengenai Undang-Undang Laut 1982 (UNCLOS).

Momentum positif dalam Kod Tatalaku (COC) di Laut China Selatan juga diharap akan berterusan sepanjang kepengerusiannya Malaysia tahun ini.

Dalam isu global seperti konflik di Gaza, Mohamad menyuarakan harapan agar gencatan senjata membawa perubahan positif dan menyokong usaha antarabangsa untuk menghantar bantuan kemanusiaan.

Beliau menegaskan ASEAN mesti terus menunjukkan kesentralan dan menuntut kebertanggungjawaban bagi keamanan sejagat.

Kesimpulannya, Mohamad lulus ujian pertama kepengerusiannya dengan cemerlang, sekali gus membuktikan kemampuan beliau mengemudi ASEAN ke arah yang lebih kukuh dan bersatu.

Pujian Setiausaha Agung ASEAN, Dr Kao Kim Hourn, terhadap pengurusan pemukiman ini adalah testimoni kejayaan Malaysia dalam menyediakan landasan kukuh untuk Sidang Kemuncak ASEAN Ke-46 di Kuala Lumpur, Mei depan.

ASEAN FOREIGN MINISTERS' RETREAT
29 JANUARY 2025, LANGKAWI, MALAYSIA

